

МЕСЯЦА АВГУСТА В 31-Й ДЕНЬ.

ПОЛОЖЕНИЕ ЧЕСТНАГО ПОЯСА ПРЕСВЯТЫЯ БОГОРОДИЦЫ

ВЕЧЕР

Обычная кафизма. На Господи, воззвах: стихиры на 6, глас 4.

Подобен: Яко добля:

Рака, содержащая, Богородице, пояс Твой, * кивот освящения рабом Твоим, * и священное ограждение, * и слава, и похвала, и исцелений источник * всегда познавается. * Идеже днесь священно собравшися, * воспеваем многая Твоя величия * и чудес пучину. [Дважды.]

Се место преславно, * се храм присносветел, * в немже сокровище положиши, * Богоотроковицы пояс честный, благодатию. * Приступите, человецы, * просвещение и очищение проявлено почерпите, * и возопийте благодарным сердцем: * Пресвятая, благословим Тя, Дево, * спасаемии Рождеством Твоим. [Дважды.]

Святое положение, Богородице, пояса Твоего, * праздник стяжахом, веселящися, * яко граду Твоему днесь дати благоизволи священное препоясание, * хранилище некрадомо, * дар честен, * неотъемлемо богатство, * исцелений реку, исполнену дарований духовных. [Дважды.]

Слава, и ныне, глас 2:

Яко венцем пресветлым, * Пречистая Богородице, * поясом Твоим святым * Церковь Божия обложися, * и светится, радующися днесь, * и тайно ликовствует, Владычице, вопиющи Тебе: * радуйся, диадимо честная * и венче Божественныя славы. * Радуйся, едина славы исполнение * и вечное веселие. * Радуйся, к Тебе притекающим пристанище, * и Предстательнице, и спасение наше.

На стиховне стихиры, глас 4.

Подобен: Дал еси знамение:

Подала еси граду Твоему * пояс Твой, Преславная, * твердое ограждение, * сего объемлющ от всякия беды Божественными действа * и непоборим от врагов соблюдающ, * любовию зовущу: * крепость моя, и держава, * и благолепно радование, * Сын Твой и Господь един есть Благоутробный.

Стих: Воскресни, Господи, в покой Твой, * Ты и Кивот святыни Твоя.

Честным венцем благочестно царствующи, * Твоим поясом, Пречистая, светло обложенни, * Твоими хвалятся Божественными величества * и страшни врагом борющим присно познаваются, * хваляще Тя и зовуще * паче слова Рожденному из Тебе: * Иисусе Преславне, * спаси всех, яко Благоутробен.

Стих: Лицу Твоему помолятся * богатии людстии.

Препояши силою нас, Дево, пояса Твоего, * на враги укрепляющи, * страсти покаяющи, * присно мучащия и борющия, * и победительное нам безстрастие присно подающи * чисто славити Тя * и Сыну Твоему вопити прилежно: * Иисусе Всесильне, * спаси всех, яко Благоутробен.

Слава, и ныне, глас 2:

Смысл очистивше и ум, * со Ангелы и мы торжествуем, * светло начинающе Давидскую песнь Отроковице, * Невесте всех Царя, Христа Бога нашего: *

воскресни, Господи,— глаголюще,— в покой Твой, * Ты и Кивот святыни Твоя, * яко бо палату красну, Сию украсив * и причте Ю граду Твоему, Владыко, * строити и покрывати от супостатных поган * державною силою Твоею, молитвами Ея.

Тропарь, глас 8:

Богородице Приснодево, человек покрове, * ризу и пояс пречистаго Твоего телесе, * державное граду Твоему обложение даровала еси, * безсеменным Рождеством Твоим нетленна пребывающи, * о Тебе бо и естество обновляется и время. * Темже молим Тя мир граду Твоему даровати * и душам нашим велию милость.

НА УТРЕНИ

На Бог Господь: тропарь Богородицы, глас 8:

Богородице Приснодево, человек покрове, * ризу и пояс пречистаго Твоего телесе, * державное граду Твоему обложение даровала еси, * безсеменным Рождеством Твоим нетленна пребывающи, * о Тебе бо и естество обновляется и время. * Темже молим Тя мир граду Твоему даровати * и душам нашим велию милость. [Трижды]

По 1-й кафизме седален, глас 3.

Подобен: Красоте девства:

Красотою девства Твоего Прекрасное Слово рождши * и Сего поясом Твоим, Чистая, яко Младенца обвила еси. * Сего убо даровала еси рабом Твоим, Владычице, покров, помощь и источник священия. * Егоже честное положение, Пресвятая Дево, вси верно празднуем.

Слава, и ныне, тойже.

По 2-й кафизме седален, глас и подобен тойже:

Рождество нетленно и девство едина имела еси, Благословенная, * одеяние же человеком спасительно, Твой святыи пояс даровала еси, * даже до ныне нетленно пребывающий, Богоневесто, * егоже ради от Бога приемлем, раби Твои, Чистая, велию милость.

Слава, и ныне, тойже.

Канона два: первый со ирмосом на 8, егоже краегранесие: Крепостию мя Твоею опояши, Чистая Дево. Творение Иосифово, ирмос по дважды, тропари на 6, глас 8.

Песнь 1

Ирмос: Колесницегонителя фараона погрузи * чудотвори иногда * Моисейский жезл, крестообразно поразив * и разделив море, * Израиля же беглеца, пешеходца спасе, * песнь Богу воспевающа.

Крепостию мя Божественною благочестно препояши, песнословяща Твой священный пояс, божественно сущи граду Твоему опоясание, и держава, Отроковице, и незыблемо остенение, Чистая Дево Препетая.

Ты Бога сильнаго родила еси, препоясующаго благочестивыя вся силою, Всенепорочная. Темже Тя блажим и Божественный Твой пояс, радостно обლობызающе, благодать почерпаем и милость.

Радостно положению днесь окрест ликуем священнаго пояса честныя Богоотроковицы, от Неяже нам препоясание нетления исткася, и нераздираема одежда, и риза священия.

Под Твою Твои людие, Всенепорочная, притекают силу, под Твой покров прибегают всегда, всем буди помощь и яже ко спасению всем подаждь прошения, спасающи от бед души наша.

Другий канон на 4, глас 4.

Песнь 1

Ирмос: Моря чермную пучину * невлажными стопами * древний пешешествовав Израиль, * крестообразныма Моисеовыма рукама * Амаликову силу в пустыни победил есть.

Свещу светоявленную и незаходимую Девы храм, яко Небо, обрет светло, Тоя пресветлый пояс, вселенную днесь чудес облистает зарями.

Крепость же и утверждения союз, Твоим, Пречистая, Божественным яко воистинну поясом мысленне опоясан град Твой, державу нераздранну имать, темже и о Тебе хвалится.

Древле яко воистинну пречестнаго кивота Твоя рака, Богородительнице, явися сущим на земли, не скрижали носящая, но верно соблюдающая истины познания.

Ароматы тайныя проливаются во храме Чистыя от честныя днесь раки и исполняют духовнаго благоволия всех, любовию к той притекающих.

Катавасия: Крест начертав:

Песнь 3

Ирмос: Небеснаго круга Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * Едине Человеколюбче.

Обновляется сердце, верою теплою прикасающася поясу священному Девы, и препоясуется силою непобедимою на страсти нечистыя и враг безплотных, невреждимо пребывающе.

Пребывает нетленен еще священный пояс Твой, иже Твое нетленное тело, Отроковице, опояса, освящающ благочестно приступающих и тли изымающ недуг и скорбей.

Была еси дом преудобрен, Чистая, Слова, из Тебе воплощеннаго, и во святем храме Твоем благоволила еси пояс Твой положить: егоже обლობызающе, освящаемся.

Честный Твой пояс честно вси радостным сердцем обლობызаем, честь сущую всех верных, Богородице, яко пречестному Твоему прикоснувшуся телеси.

Ин

Ирмос: Веселится о Тебе Церковь Твоя, Христе, зовущи: * Ты моя крепость, Господи, * и прибежище, и утверждение.

Да почтим, вернии, яко совокупления к Богу союз, Чистыя днесь пояс, и верно да поклонимся.

Всегдашнии токи благодатей, Чистая, от пречистыя раки текущии, всех верных напояют.

Исцеления верным многопетый нам днесь Пречестныя честный пояс источает благодатию.

Яко роса утренняя, веселие Твое, Чистая, точащи, страстей пещь Тя присно воспевающим угашает.

Кондак, глас 2.

Подобен: В молитвах:

Богоприятное Твое чрево, Богородице, * объемший пояс Твой честный * держава граду Твоему неборима * и сокровище есть благих неоскудно, * едина рождающая Приснодево.

Таже седален, глас 4.

Подобен: Скоро предвари:

Яко Божественное возложение, во храме Божии, Чистая, освятися пояс всечестный, * имже препоясала еси ложесна непорочная, Бога заченшая. * Темже, сему верою прикасающесе и страхом честно облобызающе, освящаемся.

Слава, и ныне, другий, глас тойже.

Подобен: Вознесыйся:

Положение Твоего честнаго пояса Церковь Твоя светло празднует * и прилежно зовет Ти, Дево Чистая: * вся опояши на силу вражию, * низложи шатание безбожных варвар * и наш управи живот делати Господня Божественная хотения.

Песнь 4

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставь недра Отча * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Взятая к Свету незаходимому, преставльшися, оставила еси Тя блажащим вместо телесе Твоего, Чистая, честный пояс, источник чудес сущи, и место спасения, и ограждение сему, чтущему Тя граду, Пречистая.

Яко в ново небо, мы входим в Твой храм, идеже сокровище положиши, якоже солнце светозарно, Твой Божественный пояс, лучи чудес испускающ, и всех сердца озаряющ, Отроковице, и страстей мглу отгоняющ.

Ты кивот мысленнаго свещения еси, Чистая Всепетая, и честную сию раку, имущую пояс, егоже на Себе носила еси, подаеши людем Твоим прибежище велие и источник исцелений неистощаемый.

Принесися Твоему граду многобогатный дар, честный пояс Твой, Всенепорочная, и положиши светло в сий день в сем Божественном храме Твоем, и бысть велия праздника, Богородице, тепле любящим Тя вина.

Закона сени и пророк гадания предсказаху: быти Тебе, Пречистая, Богу Матерь всеистинную, Еюже клятва исчезе и процвете совершенное благословение и спасительная благодать верою и любовию поющим Тя.

Ин

Ирмос: Вознесена Тя видевши Церковь на Кресте, * Солнце Праведное, * ста в чине своем, * достойно взывающи: * слава силе Твоей, Господи.

Яко пречестное утверждение, Богородице, Творец и Создатель Тя водрузив, якоже звездами, украсил Тя еси, Божественными сиянии, имиже просвещаеши концы.

Тя державу град Твой, Богородице, и твердое основание имея, Божественным поясом Твоим содержится: союз неразорим сей, в бранех протяжающ.

От земли нас возвлачит, Богородительнице, к Небеси Божественный пояс Твой, любовию Твоею и того возводимых. Тем Тя славим, яко вину славы лучшая.

Се благодать неисчерпаемая, приидите вси усердным сердцем, почерпите реки, точащая независтно, празднолюбцы, от честных раки Пречистыя Матере.

Песнь 5

Ирмос: Вскую мя отринул еси * от лица Твоего, Свете незаходимый, * и покрыла мя еси чуждая тьма, окаяннаго? * Но обрати мя и к свету заповедей Твоих * пути моя направи, молюся.

Поясу Божественному, положену днесь во храме Твоем, Богородованная, с ним положиши благих всяко даяние требующим, и наполняется священия всяк, кто, приходяй, прошения верно приемля.

Украсися, Дево, Слова Прекраснаго породивши, и во Твоем красном благоволила еси дому положитися красному поясу, иже Твое красное тело, Богородице, красно опояса.

Твой святыи храм, якоже другий рай, всем познавается: посреде стяжа, якоже благовонен шипок, пояс Твой, благовония Божественнаго исполняющ сердца, верно приступающим, Всенепорочная.

Тучи Божественныи облак была еси, Пренепорочная, искапающии спасения воду, и землю, оладеневшую грехми, к плодоносию преводящи благочестия. Сего ради верно Тя славим.

Ин

Ирмос: Ты, Господи, мой Свет, * в мир пришел еси, * Свет Святыи, обращаи из мрачна неведения * верою воспевающии Тя.

Ты, Господи, Твою Матерь возвеличил еси, Ты возвысил еси над вся мысленныи власти, без сравнения славы Тоя.

Благодать Божия ныне независтно подается, Пречистая Богородице, от честныи раки Твоя верою покланяющимся Тебе.

Твоею силою вернии людие опоясуются, Тя союз, Богородице, Твой град хвалящи, поясом Твоим чувствуется.

Ведома Твоя воистинну благодать показася, Пречистая, преславно действующая силы и знамения по всей земли.

Песнь 6

Ирмос: Бездна грехов и прегрешений буря мя смущает * и во глубину нужднаго реет мя отчаяния, * но Твою крепкую руку мне простри, яко Петрови, * о Управителю! и спаси.

Ново родила еси нам яко Отроча, прежде век сущаго, и обновляещи сердца, грехми обетшавшая, приемшая обновление, положением честнаго пояса Твоего, Отроковице Приснодево.

Святая Твоя церковь дивна в правду есть, иже чудный Твой пояс, точащии чудеса, стяжавши, бедным пучина является исцелений, Богородительнице Мати Дево.

Возвеселися всяка душа, совокупльшися во святем храме Твоем и в нем зрящи, Богородице, пояс Твой, якоже солнце светло, свет облистающ дарований Вседетеля и Божественнаго Духа.

Укрепи наша, Чистая, сердца, презревши вся согрешения, и препояши силою, пояс Твой верно стяжавших, якоже многоценно и неотъемлемо сокровище.

Ин

Ирмос: Пожру Ти со гласом хваления, Господи, * Церковь вопиет Ти, * от бесовския крове очищися * ради милости от ребр Твоих * истекшею Кровию.

Всю Тя преестественне прослави Господь, всю возвысив Тя едину, всю Тя почте паче слова, Богородице, храм с поясом и Божественною ракою.

Истекают, яко из пучины, струи благодати, от раки Пречистыя и тварь всю окружают, напаяюще верно покланяющихся Рождеству Твоему.

Крепость Тя, вернии, стяжавше и похвалу, опоясуются славою, честный Твой пояс, Богородительнице, имуще, яко пресветлую утварь и честную.

Кондак, глас 4.

Подобен: Явился еси днесь:

Честнаго пояса Твоего положение * празднует днесь Твой, Препетая, храм * и прилежно взывает Ти: * радуйся, Дево, * христиан похвало.

Икос: Твоим мя просвети светом, Дево Богородице, и разруши мою тьму, во уме лежащую люте, яко да чисто Тебе приступаю, Чистой, земныя обожившей, воспою Твой, Всенескверная и Непорочная, Божественный пояс, светлейший солнца, егоже мир сей имать яко тверд покров и надежду, побеждающ советы врагов беззаконных, и сих коварства разоряющ, и всегда сохраняющ Твоя рабы. Радуйся, Дево, христиан похвало.

Песнь 7

Ирмос: Божия снизхождения * огонь устыдеса в Вавилоне иногда, * сего ради отроцы в печи, радованною ногою, * яко во цветнице, ликующе, пояху: * благословен еси, Боже отец наших.

Всех Царица, к Небесным селом отшедши, остави богатство царю всех градов – Свой пояс, имже спасаются от нашествия видимых и невидимых враг.

Ко источнику ныне приступим, искапающему благодать и милость, раце честней, имущей пояс всечестный почетния человеческого смешение честным Рождеством Своим, Девы же и Матере.

Хвалите Господа, силы вся Небесныя, и Сего Рождшую, человечестии языцы вси, прославите: яко пояс Свой дарова, прибежище истинно и спасение верным.

Да кропят свыше правду облацы днесь, положением пояса Твоего, Облаче Богорадованный, и да сладкопоет душа всяка, радующися: благословен Бог отец наших.

Ин

Ирмос: В печи авраамстии отроцы персидстей, * любовию благочестия паче, * нежели пламенем, опаляеми, взываху: * благословен еси в храме славы Твоя, Господи.

Ты, яко Солнце правды, Едине сый Светодавче, Божественне храм Чистыя просветил еси различными Твоими дарованиями: в немже сияющи, лучи изъясняет пояс Тоя.

Яко златую стамну, Твой пояс окружающе, едина Чистая, Божественней воистинну причащаемся ныне сладости благодатей, Всеблагословенная, и скрижалей вышшую Ти, яко сущую, почитаем сию.

Источают воистинну чудес, Отроковице Чистая, чаши, Твоя благодать верным, и независтно от Твоя раки происходят, яко от инаго Едема реки.

Ныне приступите с веселием вси, иже на земли, приидите,— рака прорицает тайно Госпожи — объеми Преславную, во мне сокровиществовавшую пояс Свой.

Песнь 8

Ирмос: Седмерицею пещь * халдейский мучитель * Богочестивым неистовно разжже, * силою же лучшею спасены, сия виде, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Якоже престол свят, ковчег положиися внутрь невходимых священных светло, единыя Богоотроковицы и Царицы всех Чистыя пояс имущий покойный: от негоже труждающимся во многих болезнях покой совершен приходит неизвестно.

На земли Господа священо воплотила еси и руками святыми воистинну опоясала еси, препоясующаго благочестивыя силою; ныне же возшедши небес превыше, оставила еси человеком честный Твой пояс, Дево Богородице, державу и покров.

Недугующих исцеление, поползнувшихся утверждение и унывающих благодушие божественно, кормило плавающих, заблудших обращение, последующая честному Твоему поясу, Чистая Дево, Божественная благодать воистинну есть, емуже верою покланяемся во вся веки.

Совершающе днесь святое положение пояса Твоего Божественнаго, священное торжество, раби Твои, чтим и радостию вопием Ти: радуйся, Богородице, радости Ангелов и всех человеков, верою поющих: отроцы, благословите, священницы, воспойте, людие, превозносите во вся веки.

Ин

Ирмос: Руце распростер, Даниил * львов зияния в рове затче, * огненную же силу угасиша, * добродетелию препоясавшися, * благочестия рачители отроцы, взывающе: * благословите, вся дела Господня, Господа.

Скрижали Божественныя древле кивот, рукою написанныя Божию, содержаще, Пречистая: Твоя же, Чистая Владычице, чествованная и честная рака пояс содержит, тех законоположника содержащая в себе страшное таинство.

Ангели, Пречистая, Чистая, ныне в честном Твоем храме сликуют и объемяют, Владычице, честный и святыи Твой пояс, емуже любовию, и радостию, и веселием многим покланяемся, Тя воспевающе, славу рода нашего.

Жезл, Яже Цвет жизни прозябший, Ты еси всех радость, многоценная чистая Мироположница Духа, сокровище благих, аромат источник, из неяже миро исцелений изливает Божественная рака.

Воспевают, Пречистая, Чистая, величия Твоя мысленная воинства, проповедуют вси патриарси и пророцы явственно, апостоли со священными и мучеников ликове, с нимиже покланяемся Тебе.

Песнь 9

Ирмос: Ужасеся о сем Небо * и земли удивишася концы, * яко Бог явися человеком плотски * и чрево Твое бысть пространнейшее Небес. * Тем Тя, Богородицу, * Ангелов и человек чиновначалия величают.

Се Божественный одр Соломонов, егоже сильнии окружают шестьдесят, речения писаний, якоже на одре царсте, в ковчезе честне днесь пояс полагает Свой, на воззвание всем верным и благочестивым в снабдение.

О Граде Царя Небеснаго, о немже возглаголашася преславная! Положи Твоему граду дар честен и свят, всесвятый Твой пояс, во утверждение всем верным, имже венценосцы побеждают супостаты, Православием сияюще.

Искапайте, горы, ныне сладость, и холми, веселие вечное, патриарх собори и мученик лица, пророков же сословие, Божественных апостолов сонм честный, веселитесь со всеми нами в положении Божественнаго пояса Богоотроковицы.

Освятила еси вся Твоим, Пресвятая Дево, рождеством и ныне нам подала еси премное просвещение – пресвятый пояс Твой, егоже положением вся земля ликует и почитает Тя, радости неизглаголанная исполнившую человечество.

Любве мя лестныя страстей и врага, всегда искушающаго грехов тяготою, уныния же лютаго отведения, Пречистая, и пленения, и греха, к Твоей прибегающаго милости, вскоре, яко милостива, Чистая, премени.

Ин

Ирмос: Камень нерукосечный * от несекомья горы, Тебе, Дево, * краугольный отсечся, * Христос, совокупивый разстоящаяся естества. * Тем, веселящся, Тя, Богородице, величаем.

Чертог пречестный воистинну, Богородительнице, рака Твоя явися, святый Твой пояс, яко девственную и невестническую одежду, достойне содержащи и соблюдающе, яко живота сокровище.

Божественною диадимомою красоты Церковь, Богородице, одевшись, Божественным и всесвятым Твоим поясом днесь царски веселится и красуется славою Твоею.

Храм, по всему подобящийся небесем, благокрасный днесь Девы, вернии, приемше дарований зари, якоже звездными красотами осияеми, светлитесь.

Имать святый Твой пояс, Богородительнице, град Твой, союз мира, и стену, и догмат Божественное единство, и православных похвалу, и воем одолетельная.

Воспеваем неизглаголанную славу и неизчетную Твою благодать: Ты бо еси источник премудрости, из неяже слово всем происходит, чтущим Тя, Пречистая, и величающим Рождество Твое.

Светилен.

Подобен: Жены, услышите:

Пояс честный Твой, * имже священное Твое препоясала еси тело, Богоотроковице Дево, чтуще, * празднуем сего ныне положение, * имже тли избавляемся, и бед, и напастей, * Мати Бога Вышняго.

Слава, и ныне, тойже.

На хвалитех стихиры на 4, глас 4.

Подобен: Яко добля:

Яко пресветлым венцем, Богородице Пречистая, * святым поясом Твоим обложися Церковь, * и, радуящися, светлеется днесь, * и ликует тайно, вопиючи Тебе, Владычице: * радуйся, венче и диадимо Божественная; * радуйся, едина исполнения моего слава * и веселие вечное.

Ты, Пречистая Владычице, * державное ограждение, * незыблемо же утверждение и спасение * Твоим людем и граду Твоему сущи, * дала еси, яко светло одеяние, * пречестный пояс Твой, * спасающ от всяких злоключений * верою и теплым усердием сего чтущих, Богоневесто.

Храм Твой, Пречистая, * яко источник неисчерпаемый чудес днесь показася: * реки бо благодати независтно проливаются * от святыя Твоя раки * и верных помышление увеселяют, * верою и любовию Тебе вопиющих: * радость, и веселие, и жизнь наша Ты еси.

Слава, и ныне, глас 2:

Смысл очистивше и ум, * со Ангелы и мы торжествуем, * светло начинающе Давидскую песнь Отроковице, * Невесте всех Царя, Христа Бога нашего: * воскресни, Господи, – глаголюще, в покой Твой, * Ты и Кивот святыни Твоя, * яко бо палату красну, Сию украсив * и причте Ю граду Твоему, Владыко, * строити и покрывати от супостатных поган * державною силою Твоею, молитвами Ея.

Славословие великое. Ектении и отпуст.

НА ЛИТУРГИИ

Блаженны от канонов, песни 3-я и 6-я.

Обновляется сердце, верою теплою прикасающесе поясу священному Девы, и препоясуется силою непобедимою на страсти нечистыя и враг безплотных, невреждимо пребывающе.

Пребывает нетленен еще священный пояс Твой, иже Твое нетленное тело, Отроковице, опояса, освящающ благочестно приступающия и тли изымающ недуг и скорбей.

Была еси дом преудобрен, Чистая, Слова, из Тебе воплощеннаго, и во святем храме Твоем благоволила еси пояс Твой положить: егоже обლობызающе, освящаемся.

Честный Твой пояс честно вси радостным сердцем обლობызаем, честь сущую всех верных, Богородице, яко пречестному Твоему прикоснувшуся телеси.

Всю Тя преестественне прослави Господь, всю возвысив Тя едину, всю Тя почте паче слова, Богородице, храм с поясом и Божественною ракою. [Дважды.]

Слава: Истекают, яко из пучины, струи благодати, от раки Пречистыя и тварь всю окружают, напаяюще верно покланяющися Рождеству Твоему.

И ныне: Крепость Тя, вернии, стяжавше и похвалу, опоясуются славою, честный Твой пояс, Богородительнице, имуще, яко пресветлую утварь и честную.

Тропарь Богородицы, глас 8:

Богородице Приснодево, человек покрове, * ризу и пояс пречистаго Твоего телесе, * державное граду Твоему обложение даровала еси, * безсеменным Рождеством Твоим нетленна пребывающи, * о Тебе бо и естество обновляется и время. * Темже молим Тя мир граду Твоему даровати * и душам нашим велию милость.

Кондак Богородицы, глас 4.

Честнаго пояса Твоего положение * празднует днесь Твой, Препетая, храм * и прилежно взывает Ти: * радуйся, Дево, * христиан похвало.

Прокимен, глас 3, песнь Богородицы: Величит душа Моя Господа, * и возрадовася дух Мой о Бозе, Спасе Моем.

Стих: Яко призре на смирение Рабы Своея, се бо от ныне ублажат Мя вси роди.

Апостол к Евреем, зачало 320.

Братие, имеяше первая скиния оправдания службы, святое же людское. Скиния бо сооружена бысть первая, в нейже светильник, и трапеза, и предложение хлебов, яже глаголется Святая. По вторей же завесе скиния глаголемая, Святая святых. Злату имущи кадилицу, и ковчег завета окован всюду златом, в немже стамна злата имущая манну, и жезл Ааронов прозябший, и скрижали завета. Превышше же его херувими славы, осеняющии олтарь, о нихже несть ныне глаголати подробно. Сим же тако устроенным, в первую убо скинию выну вхождаху священницы, службы совершающе. Во вторую же единою в лето един архиерей, не без крове, юже приносит за себе, и о людских невежествиих.

Аллилуия, глас 2: Воскресни, Господи, в покой Твой, Ты и кивот святыни Твоя.

Стих: Клянется Господь Давиду истинною и не отвержется ея.

Евангелие от Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящии е.

Причастен: Чашу спасения прииму, и имя Господне призову.